

# Lebih baik miskin material daripada miskin jiwa

Oleh **PROF. MADYA DR. RATNA ROSHIDA AB. RAZAK**



Kemiskinan jiwa kebiasaannya didasari perasaan malas. Hal ini termasuklah malas berfikir, malas berusaha, malas belajar dan membaca, bersifat negatif dalam banyak perkara, tidak jelas tujuan hidup dan tidak berdisiplin

merlangan.

Tidak salah kiranya Presiden Abraham Lincoln diambil sebagai contoh dalam hal ini. Beliau yang tidak dapat meneruskan persekolahan kerana kemiskinan harta tidak menganggap itu sebagai penghalang namun dengan kekayaan jiwa yang dimiliki, menjadi pendorong utama untuknya menambah ilmu agar dapat membawa perubahan kepada kehidupannya. Beliau sanggup menunggang kuda sejauh enam batu untuk meminjam sebuah buku. Beliau membaca menggunakan cahaya lilin yang malap. Kesabaran dan ketekunannya akhirnya meletakkan beliau sebagai Presiden Amerika Syarikat.

Tradisi orang Scots yang meletakkan pelajaran sebagai keutamaan tidak dapat dinafikan. Walau bagaimanapun miskin harta sekalipun, apabila berdepan dengan soal pendidikan, mereka sanggup berjimat cermat dan berkorban demi memastikan aspek pendidikan dapat dijalankan dengan sempurna.

Banyak lagi bangsa yang meletakkan kemiskinan dan kepayahan sebagai satu cabaran dan bukannya halangan yang bersifat kekal.

Kemiskinan jiwa kebiasaannya didasari perasaan malas. Hal ini termasuklah malas berfikir, malas berusaha, malas belajar dan membaca, bersifat negatif dalam banyak perkara, tidak jelas tujuan hidup dan tidak

berdisiplin.

Mungkin ada di antara kita bangsa Melayu yang agak sensitif apabila disinonimkan bangsa Melayu dengan sifat malas. Namun sebagai bangsa yang berjihad besar, biar apa jua yang diperkatakan, yang penting adalah usaha untuk membuktikan tanggapan itu tidak tepat sama sekali.

Dengan kekuatan dan kekayaan jiwa yang dimiliki, mereka akan terus maju dan bersemangat untuk meneruskan kehidupan biarpun pelbagai cabaran yang mendatang, berbekalkan ajaran Islam yang menuntun umatnya untuk sabar dan terus berusaha dalam menghadapi sebarang cabaran atau ujian dan menganggapnya sebagai satu rahmat untuknya terus dekat dengan Pencipta yang memiliki sifat Maha Pemurah lagi Maha Pengasihani.

Islam juga dengan jelas menekankan bahawa segala cabaran dan ujian yang diberikan kepada hamba-Nya bukanlah untuk membinasakan tetapi lebih untuk melihat sejauh mana tahap kesabaran hamba-Nya untuk terus berusaha dan mengharapkan pertolongan hanya daripada-Nya.

Persoalannya kini adakah bangsa Melayu sebahagian besarnya bersikap seperti itu ataupun sebaliknya. Dalam hal ini, tepuk dada dan tanyalah diri.

Dalam aspek kekeluargaan sebagai contoh, inilah peluang terbaik untuk suami

dan isteri, juga ibu dan ayah sebagai ketua keluarga melihat semula cara hidup yang diamalkan sama ada ia mampu merubah mereka kepada sebuah kehidupan yang lebih baik ataupun sebaliknya.

Sekiranya mereka masih mengamalkan cara hidup 'cukuplah dengan apa yang ada', inilah masanya untuk bertukar kepada cara hidup yang menginginkan sesuatu yang lebih baik. Namun perlu diingatkan bahawa kail panjang sejengkal janganlah lautan hendak diduga. Dengan kata lain, usaha yang tidak seberapa jangan pula mengharapkan hasil yang banyak.

Justeru penggantian usaha adalah sesuatu yang mesti dilakukan. Inilah yang ditekankan dalam Islam sebagai amal soleh, iaitu usaha ke arah kebaikan. Malahan inilah intipati makna ihsan, iaitu sentiasa inginkan sesuatu yang lebih baik, sama ada melakukan perkara yang lebih baik atau memiliki benda yang lebih baik.

Sebagai kesimpulan, bangsa Melayu yang telah 57 tahun meraih kemerdekaan, ditambah pula dengan kehebatan teknologi komunikasi yang ada pada hari ini, pastinya tiada alasan lagi untuk terus berada di bawah, khususnya di tanah air sendiri. Bangsa Melayu perlu terus bangkit dan jangan terus menggantung harapan mereka kepada orang lain.

Kemiskinan seharusnya dijadikan pendorong untuk mengejar kejayaan dan bukanlah penghalang. Kemiskinan material hanya bersifat sementara namun kemiskinan jiwa akan menjadikan seseorang itu terus kekal miskin material untuk selamanya.

**PENULIS** ialah profesor madya di Jabatan Pengajian Kenegaraan dan Ketamadunan, Fakulti Ekologi Manusia, Universiti Putra Malaysia (UPM)